

## **Ebbaluṅa eyi Pawulo gaṅandiihira Filimooni Enyanjula**

Ebbaluṅa yino Pawulo gayiṅandiihira Filimooni (1:1). Era gayiṅandiihira mu komera, hamunga e Rooma. N’aba ni gaali e Rooma, hitegeesa hiiti gwali mu mwaha ogw’enkaaga namulala oluvanyuma lw’ohusaaliwa hwa Kurisito. Era ehyo nj’ehiseera ehi gaṅandiihiramo n’ebbaluṅa ya Bakolosaayi.

Filimooni gaali mulala hu hibbubbu hy’abafugiirira Kurisito mu hibuga Kolose era gaali n’abeedu mu mago gage. Onesimo gaali mwidu wa Filimooni. Lulala, Onesimo nga geeba musengwawe Filimooni, ng’ahena amudulumaho. Pawulo gamuṅandiihira n’amusunga ataboneresa Onesimo. Mu magambi agaali ni gaṅuga obufuzi w’Abarooma, Filimooni gaali w’edembe ohwita Onesimo. Pawulo ahubbirisa Filimooni afugiirire Onesimo ng’omuutu omunyaaha mu Kurisito (13-14).

### **Ebiri mu bbaluṅa yino mu buupi**

1. Pawulo aheesa Filimooni (1-3)
2. Pawulo asunga Filimooni afugiirire Onesimo ng’oboluganda mu Kurisito (4-21)
3. Pawulo ategeha ohuhyala (22-25)

<sup>1</sup> Ese Pawulo, omusibe hu lw’ohuṅeerese

Yesu Kurisito, ni Temuseewo mulebe yeefe, kuḽandiihira ewe Filimooni meeri yeefe omuhoda era omutambi wahyefe,

<sup>2</sup> ni mboojo yeefe Afiya, n'owahyefe Arikipo yeesi oweenayo ohuhola omulimo gwa Yesu hyefe, ko n'abafugiirira Kurisito bosibosi abahumbaanira mu mago ewuwo.

<sup>3</sup> Hatonda Seefe ni Musengwa Yesu Kurisito babanambire ehisasabirisi era babane emiyaaya.

### *Ohufugiirira n'ohwenda hwa Filimooni*

<sup>4</sup> Habuhyabuhya ni saba sikaya huhonya hu siina liryo ni neyaasa Hatonda olw'ewe,

<sup>5</sup> olwohuba binjolera ng'olu ofugiirira Yesu Musengwa era n'engeri eyi wendamo abagwalaafu bosibosi.

<sup>6</sup> Saba ti omuhumba ogu oli ni nagwo n'abafugiirira bahyo gwemeede ohuḽangala ni gwema hu hufania huhwo ebirani ebi Hatonda atuna era hino hyolerere olw'ohuḽeesa Kurisito enono.

<sup>7</sup> Owoluganda, engeri eyi wendamo abaatu yiipa esangaalo eryene ery'amaani era yingobosamo amaani; olwohuba ebi ohola bigobohi- isemo abagwalaafu amaani.

### *Ohusunga hwa Pawulo eyiri Filimooni*

<sup>8</sup> Olw'ehyo, wayire ng'omuhwenda wa Kurisito nahali kulagira bulagire ohuhola ehi nenda,

<sup>9</sup> ne olw'ohwenda ohu kwenda hipalirisa ese Pawulo omusinde omuḽangafu era oyu babona mu komera hu lw'ohuḽeeresa Yesu

Kurisito, ohuhusunga busunge ng'owahyo bukole ere ehisaaniye mu songa eyi nja hulomaho.

<sup>10</sup> Kusunga busunge osonije omwana wange Onesimo\* oyu nasaala mu hufugiirira Yesu ni ndi mu komera.

<sup>11</sup> Nanyumaho aṅo Onesimo gaali aṅuma mugaso eyi oli aye ṅaahani afuuhire wamugaso eyi huli hwembi.

<sup>12</sup> Wayire muhoda bugali eyi ndi salireeṅo ohumuhunjeeresa agobole eyi oli.

<sup>13</sup> Nahendire bugali ohumwesigahisa asobole ohupeeresa mu hifo hiho nindi ṅano mu komera omu bamboṅa olw'ohulomera abaatu Amanuliro Amalaṅi,

<sup>14</sup> aye sinenda kihole ni tehereeye huhusunga olwohuba nenda hyosihyosi ehi onasaleṅo hibe ni hiṅooye hu hwenda huhwo sosi olw'ohuhunjalirisa.

<sup>15</sup> Hamunga yaali tegeha ya Hatonda, Onesimo ohuhweyibaho, ko hibe ti gahagobola eyi oli asigale n'ali wuwo,

<sup>16</sup> cooka n'atali mwidu hyonyene aye n'afuhiire muutu wundi eyi oli. Mu mubiri n'ahiiri mwidu wuwo aye n'ali woluganda olwa Yesu Musengwa era omuhoda ehihena eyi oli, n'ohuhiraho ng'olu ali muhoda eyi ndi.

<sup>17</sup> Ale hanye mu butuufu bundiho era wupegaho ng'owahyo mu bunjeeresa, ganya osangaalire Onesimo ng'olu wahasangaaliye ese.

<sup>18</sup> Hanye ṅaliṅo esobi eyi gahuhola oba ṅaliṅo ehi omubanja, ese ndiise anahaliṅe.

---

\* **1:10 10** Amahulu g'esiina *Onesimo* gali ti *ow'omugaso*.

<sup>19</sup> Ese Pawulo aloma ni neewe era ahujandiihiye n'omuhono gwange omwene, nejaayeyo ohuliŋa. Aye weesi otebirira oti oli ehi oli olwohuba ndiise owahulomera Amanjuliro Amalanji.

<sup>20</sup> Olw'ehyo owoluganda, ganya ohole ehi kusunga ohukolera, omwoyo gwange gwihe.

<sup>21</sup> Kuŋandiihira bino ni kulimo esuubi era ni nehahasa ti soonahaye hukolera n'ebihiraho ebi kusunga.

<sup>22</sup> Ehindi, tegeherenga aŋa ohuŋenyuha, olwohuba suubira ti olw'esaala jenywe banahambonolole mu busibe obu ndimo hatyane, naajaho eyo.

<sup>23</sup> Epafuraasi omusibe wahyange yeesi oyu bahaabya ohufugiirira Yesu Kurisito, ahuhehiise.

<sup>24</sup> Abaŋeeresa bahyefe: Mariko, Arisitaluuko, Demasi ni Luka boosi bahuheehiise.

<sup>25</sup> Ehisabirisi hya Musengwa Yesu Kurisito hibe hu nywe mwesimwesi.

**Endagaano Epyaha ko n'ebitabo ebindi  
eby'Endagaano Ekayire mu Lunyole  
Nyole: Endagaano Epyaha mu Lunyole (Bible)**

copyright © 2019 Wycliffe Bible Translators, Inc.

Language: (Nyole)

Contributor: Wycliffe Bible Translators, Inc.

This is the New Testament in Lunyole of Uganda, with 10 books from the Old Testament.

All rights reserved.

2025-05-17

---

PDF generated using Haiola and XeLaTeX on 17 May 2025 from source files dated 17 May 2025

e00787cd-838f-597a-9477-00b97e4e2cff